

Dr. sc. Edina **BEČIĆ**, docent
Pravni fakultet Univerziteta u Tuzli
edina.sehric@untz.ba

UDK: 342.98 (497.6) 35.08
Pregledni znanstveni rad
Primljen: 16. 7. 2020.
Prihvaćen: 13. 10. 2020.

PRAVNO UREĐENJE DISCIPLINSKE ODGOVORNOSTI DRŽAVNIH SLUŽBENIKA U BOSNI I HERCEGOVINI

Sažetak: U radu se definira odgovornost državnih službenika za povrede službene dužnosti. Razmatraju se osnovne karakteristike i načela disciplinske odgovornosti. S obzirom da su državni službenici ključna komponenta službeničkog sistema i da su značajna pretpostavka za stalno, redovno i učinkovito funkcioniranje državne uprave, u radu se analizira pravno uređenje disciplinske odgovornosti i disciplinski postupak. Kako u Bosni i Hercegovini postoje tri različita službenička sistema koja prate njeno složeno ustavno i institucionalno uređenje, neophodno je ukazati na osnovne razlike koje postoje na nivou institucija države, entiteta i Brčko Distrikta. Međutim, i pored različitog pristupa u uređenju disciplinske odgovornosti, na svakom nivou vlasti nastoje se potaknuti državni službenici na odgovoran rad u službi.

Ključne riječi: državni službenici, disciplinska odgovornost, disciplinski postupak.

1. Uvod

Polazeći od općeprihvaćenih stavova, odgovornost podrazumijeva pravni položaj subjekta koji odgovara za neispunjenje preuzete obaveze ili za posljedice protupravne radnje, odnosno propusta dužne radnje. U radnopravnoj teoriji pojam odgovornosti veže se za polaganje računa za nešto što je na radu ili u vezi sa radom bilo obavezno izvršiti, a nije izvršeno ili se nije smjelo izvršiti, a izvršeno je. Ovaj oblik odgovornosti naziva se disciplinska odgovornost.

Disciplinska odgovornost se javlja u svim institucijama, javnim i privatnim, kako bi se osiguralo poštovanje pravila unutrašnjeg reda i poretka – rada u ovim institucijama. Posebno važan oblik disciplinske odgovornosti je disciplinska odgovornost zaposlenih – za skrivljenu povredu radne obaveze, za koju se može izreći zakonom i drugim općim aktom predviđena disciplinska sankcija. U okviru ove disciplinske odgovornosti postoje dva odvojena pravna režima – pravni režim disciplinske odgovornosti u općem režimu radnih odnosa i pravni režim disciplinske odgovornosti u posebnom režimu radnih odnosa.